



Udruženje/udruga “BH novinari”, Kralja Tvrtka 5/5, 71000
Sarajevo Telefoni: 033 223 818, 033 217 302
E-mail: bhnovinari@bhnovinari.ba, WEB: www.bhnovinari.ba

Sarajevo/Banja Luka, 29.jula 2025.

Gladovanje kao oružje, šutnja kao saučesništvo

Gospodi Borjani Krišto, predsjedavajućoj Vijeća ministara Bosne i Hercegovine
Gospodinu Elmedinu Konakoviću, ministru vanjskih poslova Bosne i Hercegovine
Gospodinu Edinu Forti, ministru komunikacija i prometa Bosne i Hercegovine
Gospodinu Sevlidu Hurtiću, ministru za ljudska prava i izbjeglice Bosne i Hercegovine
Zastupničkom domu i Doma naroda Parlamentarne skupštine Bosne i Hercegovine

Obraćamo vam se kao predstavnici **Udruženja/udruga BH Novinari** u vrijeme kada svijet svjedoči jednoj od najtežih humanitarnih katastrofa. Mi, članovi i članice Upravnog odbora BH Novinara u ime naših članova – novinara i novinarki iz cijele Bosne i Hercegovine, izražavamo duboku solidarnost sa svim civilima u Pojasu Gaze koji danas umiru jer se svijet ne usuđuje odlučno djelovati. Izražavamo solidarnost i sa našim kolegama i koleginicama – novinarima i novinarkama, snimateljima i fotoreporterima koji, uprkos svemu, nastavljaju obavljati svoje novinarske dužnosti, svakodnevno rezikujući i gubeći živote na radnim zadacima.

Svjedočimo sustavnom, namjernom izgladnjivanju ljudi u Gazi – ljudi koji danima nemaju pristup hrani, vodi, medicinskim potrepštinama ili skloništu. Djeca umiru od iscrpljenosti u naručju roditelja koji ih ne mogu hraniti. U bolnicama bebe pate od teške pothranjenosti, dok su konvoji humanitarne pomoći blokirani. To nije rezultat prirodne katastrofe – to je politička odluka, oblik kolektivne kazne iza koje stoje vlasti Izraela.

Ono što se danas događa u Gazi je ratni zločin i zločin protiv čovječnosti: glad se koristi kao oružje, a uskraćivanje osnovnih životnih potrepština, uključujući lijekove i čistu vodu, događa se pred očima svijeta. I pred našim očima! Jedini preostali svjedoci zločina I patnje su lokalni novinari. Pod blokadom i uz izričitu zabranu ulaska stranim novinarima, oni svakodnevno riskiraju svoje živote kako bi svijetu donijeli istinu. A sada su i oni ušutkani glađu.

Međunarodna i Evropska federacija novinara (IFJ i EFJ) upozoravaju da su novinari u Gazi dosegli tačku fizičkog kolapsa: gladuju, gube svijest, gube snagu – a s tim i sposobnost obavljanja svog posla. **Prema podacima IFJ-a, od početka rata u Gazi je ubijeno najmanje 187 novinara i medijskih djelatnika. Njihove smrti šalju opasnu poruku: da se istina ne smije čuti.** Zatvaranjem Gaze za strane novinare, izraelska vojska guši slobodu izražavanja i pravo javnosti da zna. Svjedočimo doslovnom ušutkivanju glasova istine – novinara i njihovog izgladnjivanja do smrti.

Nažalost, **državne vlasti Bosne i Hercegovine pokazuje suzdržanost u vrijeme kada bi svaka poštena država trebala pokazati hrabrost, dignuti svoj glas protiv ubijanja i izgladnjivanja civila, a među njima i 187 novinara i medijskih djelatnika.** Bosna i Hercegovina nema ni moralno ni ljudsko pravo na suzdržanost, budući da je i sama prošla ratno iskustvo prije trideset i više godina, kada su ubijani i izgladnjivani civili na slične načine kako se to danas dešava u Gazi.

Zahtijevamo od Vijeća ministara Bosne i Hercegovine da jasno definira svoj stav o genocidu/ili ratnim zločinima i zločinima protiv čovječnosti u Gazi, prestane se skrivati iza neutralnih formulacija i više ne izbjegava poduzimanje konkretnih akcija.

Zahtijevamo da Bosna i Hercegovina, iako je tek kandidat za članstvo u Evropskoj uniji, javno i na diplomatskoj razini podrži suspenziju sporazuma između EU i Izraela, kao i hitnu evakuaciju civila u neposrednoj opasnosti.

Zahtijevamo da Bosna i Hercegovina podrži međunarodne pozive da se stranim novinarima omogućiti pristup Gazi, osigura zaštita lokalnih novinara i pokrene međunarodna istraga sustavnog izgladnjivanja novinara i svih drugih civila kao ratnog zločina.

Bosna i Hercegovina treba i mora stati na stranu istine, humanosti i međunarodnog prava!

Očekujemo da će Vijeće ministara i zastupnici u oba doma Parlamentarne skupštine Bosne i Hercegovine snažno podržati međunarodno pravo i zaštitu ljudskih prava.

Kada se istina izgladnjivanjem ušutkava - naša je dužnost govoriti još glasnije. Moralna je i politička sramota što državne vlasti Bosne i Hercegovine u ovom trenutku šute.

Članovi i članice Upravnog odbora BH Novinara

